

Informacija o privrednom društvu Konjuh d.d. Kladanj

Konjuh d.d. Kladanj je osnovan 1968. godine. Privatizacija dijela kapitala izvršena je u 2001. godini, a Tuzlanski kanton ima većinski udio u vlasništvu Društva u iznosu od 67%. Ukupna aktiva/pasiva Društva u 2013. godini iznosila je 8.719.993 KM, a preduzeće nije ostvarilo prihode u 2013. godini, koji su se kontinuirano smanjivali od 2008. godine kada su iznosili 122.000 KM. U periodu od 2008. do 2013. privredno društvo poslovalo je sa gubitkom izuzev 2010. godine kada je ostvarilo neto dobit u iznosu od 882.000 KM.

Gubitak u 2013. godini Društva iznosi -128.037 KM. Konjuh d.d. Kladanj je u 2013. godini imao 13 zaposlenika, a zaključno sa petim mjesecom 2014. godine 5 zaposlenika.

Privredno društvo po osnovu poreza i dopinosa odnosno javnih prihoda bilježi dugovanja u iznosu od 858.855,57 KM, dok po osnovu indirektnih poreza odnosno poreza na dodanu vrijednost bilježi dugovanja u iznosu od 41.139,96 KM.

Novčana podrška Vlade Tuzlanskog kantona za Konjuh d.d. Kladanj u periodu od 2007.-2013. godine iznosila je 104.195,92 KM, za namjene organizovanja i održavanja Skupštine dioničara, zatim na ime uplate glavnog duga radi otpisa zatezних kamata u skladu sa Zakonom o visini zatezne kamate na javne prihode, na ime pomoći zaposlenicima u cilju održavanja funkcionalnosti i zaštite objekta „Muška voda“ te uplate dijela doprinosa za penzijsko i invalidsko osiguranje zaposlenika.

Konjuh d.d. Kladanj nije ostvarivao prihode u 2013. godini, i u posljednje tri godine bilježi gubitak u finansijskim izvještajima. Privredno društvo broji 5 zaposlenika čiji radno-pravni status je potrebno riješiti u narednom periodu.

Respektujući stanje u privrednom društvu Konjuh d.d. Kladanj, Vlada Tuzlanskog kantona će u 2014. godini:

- Svojim odlukama omogućiti imenovanje novog saziva Nadzornog odbora koji će imenovati novog direktora Društva, a direktor Društva će izraditi aplikaciju za finansijsku konsolidaciju u skladu sa Zakonom o finansijskoj konsolidaciji privrednih društava u Federaciji Bosne i Hercegovine. Očekuje se da od mjeseca septembra sportsko-rekreativni kompleks „Muška voda“ započne sa obavljanjem redovnih aktivnosti.
- Uraditi vlastitu procjenu (novo vještačenje) ulaganja Hotela „Tuzla“ u kompleks „Muška voda“ Kladanj, te procjenu dugovanja Hotela „Tuzla“ prema Konjuh d.d. Kladanj po osnovu neisplaćene plaće, zakupnine i drugo. Na osnovu navedene procjene, pokušati usaglasiti međusobne obaveze i potraživanja sa Hotelom „Tuzla“.